

Акафист **святым мученицам Вере, Надежде,** **Любови и матери их Софии**

Празднование 30 (17) сентября

Кондак 1

Избранным рабам Господа Вседержителя, Вере, Надежде и Любви, и мудрей матери Софии, похвальная вам пения умиленно возносим. Вы же, яко дерзновение ко Христу Богу имуще, молитесь за ны, во еже избавитися нам грехов и скорбей, да благодарственно вопием вам:

Радуйтесь, Веро, Надеждо и Любы, купно с Софиею, материю вашею премудрою!

Икос 1

Ангелы на Небеси радовахуся, добродетельное житие ваше зряще, еже провождаете в чтении Писаний Божественных, в трудах, посте, молитве и милостыни, материю вашею непрестанно суща поучаеми, да явитесь образи живии триех богословских добродетелей, ихже именами наречены бысте. Мы же, таковой мудрости матере вашей и совершенному благоразумию вашему дивящися, благоговейно рцем вам:

Радуйтесь, единомысленныя сестры, трием добродетелем тезоименитыя; радуйтесь, в повиновении богомудрей матери вашей на степени совершенствования вшедшия. Радуйся, аки три райския ветви, в зловернем Риме возрасшия; радуйся, Софии, дочерем твоим имена добродетелей

нарекшая, яже вещь исполняти научила еси. Радуйся, Веро, верою невидимое, яко видимое, зрети нам помогающая; радуйся, в нетление облеченная. Радуйся, Надеждо, надеждою страдания наша во юдоли скорби ослабляющая и в горняя десницею указующая; радуйся, Царствие Небесное унаследовавшая. Радуйся, Любы, любовь Божественною блаженство безсмертных жизни нам открывающая; радуйся, благодатию Духа Святаго осиянная. Радуйся, Софии, си есть премудрость, премудре дщери твоя воспитавшая; радуйся, в добродетелех веры, надежды и любви нас утверждающая.

Радуйтесь, Веро, Надеждо и Любы, купно с Софиею, материю вашею премудрою!

Кондак 2

Видящи мудрая София слуги, пришедша звати ю со дщерьми ко царю Адриану, и познавши вину призвания своего, ста со чады своими на молитву, помощи Бога просящи: по молитве же, емшеся за руче, якоже венец уплетенный, идяху вкупе, поюще Христу Богу: Аллилуиа.

Икос 2

Разум несумненный имели есте, святые, егда бо в палаты царския введены бысте, цареви Адриану предстае с лицом светлым, очесы веселыми и сердцем мужественным. Царь же, зря честная лица ваша неустрашенна и мудрость Софии уведев, отложи на ино время суд свой и отсла вы к некоей

благородней жене, у неяже пребысте три дни, матери вашей премудрей Богодухновенными словесы день и ночь вас поучающей. Темже ублажающе вас, зываем сице:

Радуйтесь, три непорочныя агницы Христовы, венец добродетелей в себе совокупившия; радуйтесь, три добродетельныя сестры, твердую веру, несумненную надежду и нелицемерную любовь ко Господу Богу явившия. Радуйтесь, не пощадевшия красоты и младости вашея, Краснейшаго ради добротою паче сынов человеческих; радуйся, Софии, чада твоя возлюбленная на подвиг мученическ за Христа наставлявшая. Радуйся, Веро, мучением за Христа веру твою исповедавшая; радуйся, сестры твоя крепкою верою воздвизавшая. Радуйся, Надеждо, твердое надеяние на Христа возлагавшая; радуйся, сестры твоя неослабною надеждою укреплявшая. Радуйся, Любы, муками за Христа любовь твою действительную показавшая; радуйся, сестры твоя огнем любве ограждавшая. Радуйся, Софии, сладкая чада твоя увещававшая презрети славу и богатство и всю сладость мира сего тленного; радуйся, добрыя дщери твоя до крове стати за Господа и умрети за Него усердно учившая.

Радуйтесь, Веро, Надеждо и Любы, купно с Софиею, материю вашею премудрою!

Кондак 3

Силою Божественною осенени бяху мученицы, яже добродетели имен своих явиша делом в подвизах мученических, воспевающе Богу: Аллилуиа.

Икос 3

Имуще в себе святыя мученицы столп веры, криле надежды и огонь любви, в сладость послушающия от словес матере своея, едина другую в долготерпении утверждаху и радостно идяху, желаяще честнаго мученичества, еже за Христа. Тому покланяющесе, яко Богу нашему, сицевыми вас воззваными почитаем:

Радуйтесе, ни мало не поскорбевшия о лишении временнаго сего живота вечныя ради жизни; радуйтесе, чести ради Христовы плоть на муки предавшии. Радуйтесе, три многоценныя сосуды веры, надежды и любви Богу в дар принесшия; радуйся, Софии, яко, любви ради презельныя ко дочери твоим, всем сердцем возжелела еси, да Царствие Божие наследуют. Радуйся, Веро, души наша верою озаряющая; радуйся, к тихому пристанищу нас возносящая. Радуйся, Надеждо, сердца наша сладостию надежды оживляющая; радуйся, из пучины отчаяния нас извлекающая. Радуйся, Любы, страдания и скорби наша в радость прелагающая; радуйся, окамененная сердца наша во умиление преводящая. Радуйся, Софии, мудростию на благое нас наставляющая; радуйся, потемненное око душ наших просвещающая.

Радуйтесе, Веро, Надеждо и Любы, купно с Софиею, материю вашею премудрою!

Кондак 4

Буря ярости мучителейы нападе на тя, святая Веро, но не поколеба тя: кто бо возможет веру неодолимую

подвигнути, адаманта крепчайшую, яже верных научила есть пети с тобою Богу: Аллилуиа.

Икос 4

Слышащи мудрая мати дщери своя пред царем небоязненно Христа исповедающия, и глаголющия, яко тою одинаго желают, еже бы страдати и терпети горкия муки Сладкаго ради Иисуса Христа, радовашесе вельми и моляще Бога, да укрепит я в предлежащих муках. Сие убо изволение похваляюще, первейшей дщери мудрыя матере тако воспоем:

Радуйся, Веро, немилосердая биения Сладчайшаго ради Иисуса сладце приемшая; радуйся, урезанная сосца твоя, аки два крина чистоты, в жертву Господу принесшая. Радуйся, яко от язвы твоея вместо крове млеко истече; радуйся, яко на раскаленное железо положена была еси. Радуйся, яко в коноб кипящ ввержена сущи, ни мало не опалилася еси, ниже вредилася еси; радуйся, страстей наших небесною прохладою утишающая. Радуйся, огонь мучений наших в болезнях угашающая; радуйся, знамением веры посреде напастей нас знаменующая. Радуйся, щитом веры во брани со врагом нас покрывающая; радуйся, честную главу твою за Главу Церкви, Христа Бога, под меч радостно преклоншая. Радуйся, яко обagrением крове твоея, аки червленицею, одеяна, явилася еси очесем Безсмертнаго Жениха твоего: радуйся, к желанному краю пришедшая и любимаго Спаса и Господа узревшая.

Радуйтесь, Веро, Надеждо и Любы, купно с Софиею, материю вашею премудрою!

Кондак 5

Богоданным звездам уподобилися есте, Веро, Надеждо и Любы, всем бо сердцем прилепившася ко единому вечному животу и красоте неизреченней, Иисусу Христу, скоро шествовасте, во еже умрети за Него и насладитися Божественнаго Его видения, поюще Ему: Аллилуиа.

Икос 5

Видевше добропобедныя сестры святуу Веру радостно за Христа пострадавшу, и сами хотяху души своя за Него положити: царь же Надежду святуу начат испытovati, и видев ю с сестрою единомысленну сущу, на муки вдаде ю, обаче ничтоже успе. Мы же, Надежду святуу о сицевом ея мудровании ублажающе, воспоим и прославим ю:

Радуйся, Надеждо, жестоко биенная, обаче пресветлую надежду на Господа не потерявшая; радуйся, муки твоя безропотно в молчании терпевшая. Радуйся, и нам крепкое терпение подающая; радуйся, яко в разжженной печи неопаляема бывши, хвалу Богу возсылала еси. Радуйся, яко и нас во страданиях хвалити Бога научаеши; радуйся, яко ногтями железными строгана была еси. Радуйся, нас, сущих в скорбех, лучами надежды осиявающая; радуйся, яко чудное некое благоухание от язв твоих исхождаше. Радуйся, непоколебимое упование на Господа Иисуса неизменно сохраняющая; радуйся, безнадежность и бессилие в сердцах наших истребляющая. Радуйся, мучное посечение за Христа радостно приемшая;

радуйся, ясная деннице, нам, печальми земными угнетенным, мир вечный раскрывающая.

Радуйтесь, Веро, Надеждо и Любы, купно с Софиею, материю вашею премудрою!

Кондак 6

Проповедником и Апостолом Богоносным подобны бысте, богомудрыя сестры: добродетельми бо вашими проповедасте всем верным веру, надежду и любовь ко Господу, Владыце всех, Тому поюще: Аллилуиа.

Икос 6

Возсияла еси, аки солнце, Любы святая, кто бо сице за возлюбленнаго Господа своего можаше стати, якоже Любы, понеже писано есть: крепка яко смерть любви, вода многа не может угасити любве, и реки не потопят ея. Молим ти ся ныне, Любы святая, серафимским пламенем любве ко Господу горящая, обнови окамененная и изсохшая сердца наша, возжги в нас, оскудевших любовию, свет любве, да возлюбльше Господа и вся ближняя наша, тебе яко молитвенницу нашу, восхвалим сице:

Радуйся, Любы, яко любве твоя ко Христу води многи прелестей мирских не угасиша; радуйся, яко вся ласкания и дары царицы отвергши, душу твою за Господа положила еси. Радуйся, яко любве твоя реки бед и страданий не потопиша; радуйся, за Господа Иисуса на колеси протягнутая, жезлием биенная, свердлами прободенная и в печь огненную вверженная. Радуйся, яко в лютых муках твоих силою Божиею укрепляема была еси; радуйся,

кровию твоею, любви ради Безсмертному Жениху твоему Христу излианною, в хладных сердцах наших любовь возбуждающая. Радуйся, яже показавшая нам, яко любви ради вся мучения сладце претерпеваются; радуйся, явившая нам, яко любви Божественная приводит к животу вечному. Радуйся, самую вещь уверившая, яко любви Божественная откровение есть бессмертия; радуйся, яко никакоже мучительства возмогоша разлучити Любовь от любви Христовы. Радуйся, в муках апостольски вещавшая, яко не разлучит тя от любви Божия ни скорбь, ни теснота, ни гонение, ни глад, ни нагота, ни беда, ни меч; радуйся, любви ради Христовы мечем во главу усеченная.

Радуйтесь, Веро, Надеждо и Любы, купно с Софиею, материю вашею премудрою!

Кондак 7

Хотяще скорее от тела разлучитися и со Христом быти святая девы, егда на вечное посещение идяху, едина другую и мать свою Софию объемлюще лобызахуся, дружескому нас люблению поучающе, да вси купно поем Богу: Аллилуиа.

Икос 7

Новое чудо показа Господь, егда помощь свою посла страдавшим за исповедание имене Его толико юным девам: верою бо, надеждою и любовью укрепляеми и возносими бывше, доблественне подвиги своя скончаша. Мы же в единомыслии и единомушии до конца живота пребывших молим вас, да и нам

низпослете единомыслие в совершении добрых дел, умиленно величающим вас:

Радуйтесь, Веро, Надеждо и Любы, едином путем мучений до врат небесных шедшия; радуйтесь, в пресветлый чертог прелюбезнаго Жениха вашего во гласе радования вшедшия. Радуйтесь, яко Иисус Христос просвети, якоже звезды на небеси, раны на телесех ваших; радуйся, Софии, доблественне на муки чад твоих взиравшая. Радуйтесь, яко небесною красотою, еяже око не виде, украси Господь доброту вашу, муками отъятую; радуйтесь, венцы воздаяния приемшия. Радуйтесь, аки три звезды, Солнцем правды озаренныя; радуйся, Софии, в мужественном исповедании дщерьми твоими имене Христова утешение велие обретшая. Радуйтесь, мглу сомнений наших рассеивающия; радуйтесь, нас удрученных страданьми душевными и телесными, подкрепляющия. Радуйтесь, красотою любви сердца наша украшающия; радуйся, Софии, крепосте и утешении изнемогающих в бедах и нуждах.

Радуйтесь, Веро, Надеждо и Любы, купно с Софиею, материю вашею премудрою!

Кондак 8

Странное и непонятное нам немощным, в мирских сластех погрязнувшим, зрим дело, яко София святая возлюбленных чад своих видящи лютыя и горькия муки и смерти, ни мало не поскорбе, но возрадовася зело духом, поющи Богу: Аллилуиа.

Икос 8

Вся бе в вышних мудрая София, егда дочери своя сладкими словесы и мудрыми увещаньми на мучения подвизаше. Аще же от естества к слезам преклоняшеся абие, от любве Христовы прелажашеся на радость, печаль бо сердечную болезнь о чадах матернюю победи в ней любви Божия. Велиею убо любовию дочери своя любящи, паче всею тем Царствия Небеснаго желаше. Сею ради, чудящеся мудрости и велицей любви твоей ко дочерем и славяще тя, взываем:

Радуйся, Софие, яко возвеселися душа твоя о блаженней кончине дочерей твоих, святое имя Господа дерзновенно исповедавших; радуйся, в мученичестем венчании чад твоих честь и славу приывшая. Радуйся, участия мученическаго и спребывания со дочерьми в небесней славе Христа Бога сподобльшаяся; радуйся, честная телеса дочерей твоих с радостными слезами погребшая. Радуйся, три дни гробу их приседевшая и сном смерти о Господе почившая; радуйся, аще и не плотию, обаче сердцем за Христа страдавшая. Радуйся, яко три добродетельныя дочери, сими веру, надежду, любовь к Богу явивши, в дар Пресвятой Троице принесла еси; радуйся, яко чадородия ради спаслася еси. Радуйся, дивная мати, благия памяти достойная; радуйся, дочери твоя, да кровь твою за Христа пролиют, молившая. Радуйся, умудряющая ны, да блюдем непреложно добродетели веры, надежды и любве; радуйся, Животворящей Троице за ны молящаяся.

Радуйтесь, Веро, Надеждо и Любы, купно с Софиею, материю вашею премудрою!

Кондак 9

Вси Ангели дивляхуся о страданиях ваших, святые мученицы, и победу вашу над диаволом торжествующе, души же ваша к небеси провождающе, воспеваху Христу Богу: Аллилуиа.

Икос 9

Витии велеречивии вся страдания ваша за Христа не возмогут изрещи, дивящиеся же толиким подвигом, во молодых летех подъятым, немотствуют. Мы же о честней кончине вашей Бога прославляюще, величаем вас сице:

Радуйся, Веро, Надеждо и Любы, поющая хвалу Богу, на небо небесе возшедшему; радуйтесь, щите веры, броне надежды и светильниче любви. Радуйтесь, зрением пресветлаго лица Божия наслаждающиеся; радуйся, Софие, благочестивая матери на мудрое воспитание чад их наставляющая. Радуйтесь, поучающие ны, да взыщем Господа, и жива будет душа наша; радуйтесь, с верою, надеждою и любовью прибегающих к вам теплые молитвенницы. Радуйтесь, вразумляющие ны, яко вся сладость и прелесть мира сего яко дым исчезает, яко прах от ветра разметается и в персть обращается; радуйся, Софие, по сердцем Господа Бога возлюбльшая. Радуйтесь, аки трие светлии ключи, ко единому источнику жизни притекшии; радуйтесь, аки трие благовоннии цветы, на единой благоплодной

ветви прозябшии. Радуйтесь, аки три зерцала, безпредельную красоту Божию в себе отражающая; радуйся, Софие, аки маслина, три ветви, отягченные изобильными плодами даров Божиих, произрастшая.

Радуйтесь, Веро, Надеждо и Любы, купно с Софиею, материю вашею премудрою!

Кондак 10

Спасти хотяще души своя святые мученицы, любве ради Христовы ласкания царева и богатства мира сего тленного презреша и радостно кончину мученическую за Христа прияша, поюще Ему: Аллилуиа.

Икос 10

Стенами веры, надежды и любве являются святые мученицы всем, прибегающим к ним с теплою и усердною молитвою, и сице в печалех и напастех к ним взывающим:

Радуйтесь, язв греховных добрая целительницы; радуйтесь, во тме печали нашея светом упования ны озаряющая. Радуйтесь, посреде напастей и скорбей дивный покой нам посылающая; радуйся, Софие, о нас, в злостраданиих поверженных, мудрое попечение являющая. Радуйся, Веро, крест спасения пред нами воздвизающая, радуйся, немощи наша по молитвам к тебе исцеляющая. Радуйся, Надеждо, якорь избавления нам подающая; радуйся, уныние сердец наших благостно отъемлющая. Радуйся, Любы, твоим ко Господу ходатайством в злей напасти от нечаянных смерти ны ограждающая; радуйся,

изнемогающия силы наша на бодрость
возставляющая. Радуйся, Софии, прилежная о нас к
Богу молитвеннице; радуйся, в добрых делах наших
мудрая наставнице.

Радуйтесь, Веро, Надеждо и Любы, купно с Софиею,
материю вашею премудрою!

Кондак 11

Пение сие похвальное, аще бы и тмочисленное
приношахом вам святая мученицы, не бы довлело ко
прославлению добродетелей и подвигов ваших: обаче
хвалу Богу возсылающе за вся, яже во святых Своих
нам являет, Тому поем: Аллилуиа.

Икос 11

Светом небесным пред Господем горящим свещам
подобны Вера, Надежда и Любы, купно с материею
их Софиею, к нимже припадаем, моляще, да
просветят ны, омраченныя печальми и из глубины
сердец зовущия:

Радуйтесь, ризы ваша в крови Агнчи на земли
убелившия; радуйтесь, живота вечнаго нам
ходатаицы. Радуйтесь, душ, ищущих покоя в
милосердии Божии, утверждение и хранение;
радуйся, Софии, от суеты мирския ны ограждающая.
Радуйся, Веро, доброценная кадильнице, фимиам
хвалы Богу возносящая; радуйся, нас грешных верою
просвещающая. Радуйся, Надеждо, в скорби
утешение и прибежище наше; радуйся, в печалех
наших лучезарная вестнице избавления. Радуйся,
Любы, незлобие и кротость в сердца наша

вливающая; радуйся, таинственная звезда, от тесноты земных горены возносящая. Радуйся, Софии, мудрая и пречестная детоводительнице; радуйся, богомудраго жития молящимся ти устроительнице.

Радуйтесь, Веро, Надеждо и Любы, купно с Софиею, материю вашею премудрою!

Кондак 12

Благодать Божию прияти сподобившиися молитве о нас, святых мученицы, Пречистаго Владыку Христа, да милостив будет к нам грешным, с верою, надеждою и любовью к Нему Единому, Господу и Спасу нашему, смиренно поющим: Аллилуиа.

Икос 12

Поем ваша крепкия подвиги, верою, надеждою и любовью проникновенныя, почитаем страдания ваша презельная, хвалим дивное терпение ваше, ублажаем кончину, за Христа вами радостно подъятую, величаем неборимое мужество ваше, святые мученицы Веро, Надеждо и Любы, и мудрая мати Софии, и прославляюще вас, взываем сице:

Радуйтесь, аки три струи молниины, от восток даже до запад добродетельми своими просиявшия; радуйтесь, фиали веры, надежды и любве, животворным питием души наша напаяющи. Радуйтесь, трие светозарнии путие, ко престолу славы Господни нас ведущии; радуйся, Софии, чад ради твоих от лика святых похваленная. Радуйся, Веро, цвете веры, паче снега белейший; радуйся, услаждение страждущих. Радуйся, Надеждо,

угнетенных сердец возношение; радуйся, аки поток
цельбоносный, жажду скорбящих утоляющая.
Радуйся, Любы, венче из мира, радования и благодати
соплетенный; радуйся, умная зарнице вечности.
Радуйся, Софии, жезле силы, кротце и мудре чада
наказуяй; радуйся, Боговедения пресветлая луче,
душам нашим возсиявающая.

Радуйтесь, Веро, Надеждо и Любы, купно с Софиею,
материю вашею премудрою!

Кондак 13

О святыя и достохвальныя мученицы, Веро,
Надеждо и Любы, и мудрая мати Софии, ныне
приемше малое сие моление наше, от всяких ны бед,
болезней и скорбей молитвами вашими избавите, да
сподобившися во Царствии Небесном зрети
безсмертнаго Господа Иисуса, с вами вкупе воспоем
Ему: Аллилуиа.

(Этот кондак читается трижды, затем икос 1 и кондак 1)

Икос 1

Ангелы на Небеси радовахуся, добродетельное
житие ваше зряще, еже провождаете в чтении
Писаний Божественных, в трудах, посте, молитве и
милостыни, материю вашею непрестанно суца
поучаеми, да явитесь образи живии триех
богословских добродетелей, ихже именами наречены
бысте. Мы же, таковой мудрости матере вашей и
совершенному благоразумию вашему дивящися,
благоговейно рцем вам:

Радуйтесь, единомысленныя сестры, трием

добродетелем тезоименитыя; радуйтесь, в повиновении богомудрей матери вашей на степени совершенствования вшедшия. Радуйся, аки три райския ветви, в зловернем Риме возрасшия; радуйся, Софии, дочерем твоим имена добродетелей нарекшая, яже вещью исполняти научила еси. Радуйся, Веро, верою невидимое, яко видимое, зрети нам помогающая; радуйся, в нетление облеченная. Радуйся, Надеждо, надеждою страдания наша во юдоли скорби ослабляющая и в горняя десницею указующая; радуйся, Царствие Небесное унаследовавшая. Радуйся, Любы, любовь Божественною блаженство безсмертных жизни нам открывающая; радуйся, благодатию Духа Святаго осиянная. Радуйся, Софии, си есть премудрость, премудре дочери твоя воспитавшая; радуйся, в добродетелех веры, надежды и любви нас утверждающая.

Радуйтесь, Веро, Надеждо и Любы, купно с Софиею, материю вашею премудрою!

Кондак 1

Избранным рабам Господа Вседержителя, Вере, Надежде и Любви, и мудрей матери Софии, похвальная вам пения умиленно возносим. Вы же, яко дерзновение ко Христу Богу имуще, молитесь за ны, во еже избавитися нам грехов и скорбей, да благодарственно вопием вам:

Радуйтесь, Веро, Надеждо и Любы, купно с Софиею, материю вашею премудрою!

Молитва первая

О святых и достохвальных мученицы Веро, Надеждо и Любы, и доблестных дочерей мудрая мати Софие, к вам ныне притецем со усердною молитвою; что бо паче возможет продстательствовати за ны пред Господем, аще не вера, надежда и любви, три сия краеугольные добродетели, в нихже образ нареченных, самую вещь тыя яviste! Умолите Господа, да в скорбех и напастех неизреченною благодатию Своею покрывает ны, спасет и сохранит, яко благ есть и Человеколюбец. Того славу, яко солнце незаходимое, ныне зряще светолепну, споспешествуйте, нам во смиренных молениях наших, да простит Господь Бог грехи и беззакония наша, и да помилует нас грешных и недостойных щедрот Его. Молите убо о нас, святых мученицы, Господа нашего Иисуса Христа, Емуже славу воссылаем, со Безначальным Его Отцем и Пресвятым и Благим и Животворящим Его Духом, ныне, присно и во веки веков. Аминь.

Молитва вторая

О святых мученицы Веро, Надеждо и Любы, и мудрая мати Софие! К вам ныне со усердною молитвою притекаем. Умолите убо Господа, да в скорбех и напастех неизреченною благодатию Своею покрывает ны, раб Своих (*имена*), и сохранит, и Того славу, яко солнце незаходимое, зрети да сподобит. Споспешествуйте нам во смиренных молениях наших, да простит Господь Бог грехи и беззакония наша, и да помилует нас, грешных, и щедрот Своих

да сподобит нас Христос Бог, Ему же славу возсылаем, со Безначальным Его Отцем, и Пресвятым и Благим и Животворящим Его Духом, ныне и присно и во веки веков.

Молитва третья

Вас, святые мученицы, Веро, Надеждо и Любы, славим, величаем и ублажаем, купно с мудрою матерью Софиею, ей же поклоняемся, яко образ богомудраго попечения являющей. Умоли, святая Веро, Творца видимых и невидимых, да веру крепку, неблазненну и нерушиму подаст нам. Ходатайствуй, святая Надеждо, пред Господом Иисусом за нас грешных, да упование на благая Своя не отженет от нас, и от всякия скорби и нужды да избавит ны. Исповеждь, святая Любы, Духу истины, Утешителю, напасти и печали наша, да Той свыше сладость небесную низпослет душам нашим. Помозите убо в бедах наших, святые мученицы, и, купно с мудрою матерью вашею Софиею, молитесь Господа Бога, да сохранит под покровом Своим Церковь Свою Святую. Такожде и о всех нас вашего теплаго предстательства пред Богом усердно молим, да купно с вами и со всеми святыми превознесем и препославим пресвятое и великое имя Отца и Сына и Святаго Духа Бога, предвечнаго Владыки и благих Содетеля, ныне и присно и во веки веков. Аминь.